



UKA16/75

17. oktober 2016

Mimi Karlsen

**Immikkut ittumik suliniutit meeqqanik inuusuttuaqqanillu sumiginnaasernerup annikillissarnissaanut pingaartumillu angajoqqaatut akisussaaffimmik erseqqissaanissamut tunngasut ingerlanneqarsinnaanerit pillugu apeqquteqaat aallaavigalugu Inatsisartut oqallinnissaannik siunnersuut.  
(Inatsisartunut ilaasortaq Anthon Frederiksen, Partii Naleraq)**

Inuit Ataqatigiit Anthon Frederiksen qutsavigiumavaat oqallisissiamut pingaarluinnartumut. Pingaarluinnartuuvormi meeqqanik sumiginnaannerup pinaveersaartinnissaa. Meeqqanilli sumiginnaaneq qaangerniarutsigu oqallisiinnarata iliuuseqarasuarnissaq pingaaruteqarluinnarpoq. Iliuuseqarnerilli ilaat piffissaq sivisooq atorlugu aatsaat sunniutilertarput. Taamaammatt pingaartikkatsigatta Meeqqat Siunnersoqatigiit, Nakuusa, aammalu meeqqat illersuisuat pilersippagut. Meeqqat ataqqineqarlutik, taamalu akisussaaqataallutik inooqataanissaat aqutissiuupparput, taannalu akisussaaqataallutik inersimasunngornissaannut aqutissiuussivoq.

Tassa pingaaruteqarluinnarpoq siunissami iluaqutaasussanik ullumi aningaasaliinissarput. Taamaammatt Inuit Ataqatigiit Aningaasanik Inatsisissap suliarinerani meeqqanut suliniutinut aningaasanik immikkoortitsinissaq pingaartutut piumasaqaatigaarput.

Meeqqat angajoqqaaminnik sumiginarneqassanngippata iliuuseqarfigisassagut arlaqarput. Siullermik inuiaqatigiinni pingaaruteqarluinnarpoq ilaqutariit, angajoqqaajunissaminnut periarfissasaasa pitsaasuunissaat. Angajoqqaanngorlaat erninermi sulinngiffeqarneri pitsaanerusariaqarput. Angajoqqaanngorlaat meeqqap inunngoqqaarnerani toqqissisimatsitsinissamik periarfississavaat.

Angerlarsimaffeqarsinnaanerup akisunngitsup toqqissisimasulli periarfissaanissaa ammaanniartariaqarparput.

Angajoqqaat aningaasarsiorfigissaartariaqarput, akiligassanut ernumanatik meerartaminnut toqqissumik perorsaasinnaaqullugit.

Suliffiit ilaqutariinnut, angajoqqaanut pitsaasuusariaqarput, angajoqqaat suliffeqaraluarlulluunniit qitornaminnut piffissaqartarnissaat pingaartillugu.

# INUIT ATAQATIGIIT

## INATSISARTUNI



Angajoqqaat pikkorissarnissaminnut pisariaqartitsisut periarfisittariaqarpagut.

Angajoqqaat tapersorsorneqarnisamik pisariaqartitsisut tapersersortissaanniut periarfissat amerlisariaqarpagut.

Inuit Ataqatigiit isumaqarpugut ilaquataariisuuseq sutigut tamatigut pingaartissagipput, taannalu suleriaatsini assinngitsuni atortuartaqarpagut. Angajoqqaajugutta, sulisisuugutta, sullissisuuguttaluunniit ilaqutariisuuseq pingaartittuassavarput, taannaammat inunnik toqqissimatitsisoq.

Meeqqanik sumiginnaanerup unitsinnissaa tamarmiulluta suliniarfigisariaqarpagut, ataatsimoorluta kivitsinitsigut.

Oqallisissiami uku immikkut taaneqartut ima oqaaseqarfigiumavagut.

1.

Meeqqat ilaasa unnuarsuarmut nakkutigineqaratik aneertarnerat annikinnerusunngortinniarsinnaavarput angajoqqaatut pikkorissaanermi meeqqat toqqissiaartarnissaanik ilinniartitsinikkut. Meeqqalli aamma akisussaaffimmik ilinniartariaqarpagut angerlarfissaq piffissaliussa qqaangernaveersaassallugu.

2.

Aalajangersaasariaqalinnginnerluta, Island assigalugu meeqqat assersuutigalugu 15-it inorlugit ukiullit nalunaaqutaq unnukkut aqqanernuttamarmik angerlarsimareersimasassat?

Ussernartorsiornarsinnaagualarpoq unnukkut aneernissamik killiliinissaq. Uagulli pingaartinneruarput inuit kajumissusiat, nammineersinnaassusiat ineriartortissallugu. Inuiaqatigiinni akisussaaqataaneq ersarinnerusariaqarpoq. Kinaluunniit meeqqamut inatsisinnaavoq angerlaqullugit.

Angerlarfissarliuna aamma toqqissuusariaqartoq, tamannalu suliassatsinni pingaarnerpaajuvoq.

Meeqqat inuusuttullu toqqissumik, ilaqutariinnik nukittuunik, sullilluarneqartunik angerlarsimaffeqarnissat sulissutiguaannassallugu pingaartippagut, anguniartuaannassallugulu.

Taama naakkaluamik oqaaseqarluta oqallinnissamut peqataalluarumavagut.